

三水縣志卷三

知縣朱廷模主修

陽湖孫星衍撰

城署關橋坊古陞六

明邠州志三水縣城圍五里三分成化十四年知縣楊豫成化二十一年知縣馬宗仁正德七年知縣趙璽嘉靖二十六年知縣蔣廷佩俱增修闊一丈三尺高三丈五尺池闊二丈五尺深一丈

縣舊志城周五里五分有奇西北枕山谷東南臨溪河門四知縣秦渠名其東曰賓陽南曰凝薰西曰志岐北曰拱辰歲久崩湮庚戌知縣林重葺城樓曰舟翠樓

明李錦創修城池記三水古幽谷也山環水繞地形完美周人基此以開王業秦漢隋唐皆爲近畿大邑此蓋圖志之可

三水縣志卷三

考者也有元至正十有八年移置淳化縣始廢明因之成化丁酉居民思復故邑上陳制下仍立三水爲縣從民便也壇社廟學官署廨舍悉如城邑惟城池門堞則歷有十餘祀經兩君而未及建焉越丁未新樂馬侯奉命來知縣事將期月紀綱粗布重念城池爲保民之具王政之所不廢且知民可使而力可爲也乃謀及有衆相土度工經畫財用從事土木壯者借其力富者勸其財工惟其巧農適其閒程以日計者若干以工計者若干泉以緡計者又若干城之制周圍五里五分有奇豎高三丈闊減丈之尺上樹以堞城之下濬而爲壕深丈有五尺東西溪水復依壕而注之四面咸關以門門之制以土爲胎則甃以石以木爲骨則護以鐵圖永固也門之上各建一樓表瞻望也功始於成化丁未十月迄於宏治

戊申三月落成之日官民胥慶巍然爲一邑之保障真可以
捍敵而禦侮矣然是役也地勢崇卑率因舊址戒事成功悉
倣周制就利避害咨謀僉同及慰勞督勸則盡公之力而人
不與焉嗟功成而民不勞費裕而民不怨侯之賢勞其至矣
今季春侯以築城之役雖涉分內而邑之新當亦托之金石
以昭示後人也迺走書倣廬句文以記之余惟昔孔子之作
春秋也一城垣之築必書于策雖以勞民爲重而下陽虎牢
亦明其有不可不築者蓋古者聖人之垂訓必兼盛衰而立
法世不大同官天下者旣不可得家天下者亦必以城郭溝
池爲固故世之欲禦患保民者亦不可不以設險守國爲重
務也我國家以文運綏太平百有餘年申飭倣守而於城池
之備蓋惓惓焉其亦古人保民致治之至圖也今馬侯筮仕
之初獨能以此爲務亦可謂深知爲政之體矣不亦可嘉乎
侯名宗仁字本元世爲新樂望族祖諱謹正統閒由監察御
史累遷都憲出撫河南風裁著於天下至今人慕之然則侯
之爲政其亦有所自耶或曰馬侯之爲縣也未三載引西溪
之水通流縣城人獲灌溉之利完逋負之稅致其復業戶有
增羨之美扶善刈強興廢起墮善政纍纍下安而上獲已膺
旌勞之榮是皆可紀者也豈獨城池爲然哉余曰墮淚之碑
循良之傳事固各有專主也余非隱人之善者特不敢謾且
濫焉或曰唯遂書此爲創修城池記

右城

林逢泰舟翠樓紀咏序余少誦詩至幽風竊嘆周家八百之
盛始基之矣吳季子論樂云美哉蕩蕩乎樂而不淫洵非誣

也迨承乏茲邑身履其地跡其山川原隰與篤公劉章合攷
邑志又所稱膏雨之郇伯者恒在于斯而流風遺俗猶有存
焉第兵燹以後瘡痍未起城郭榛蕪滿目蕭然且瘠土之民
稼穡外無他謀如七月所載蠶績諸事邈焉難追僅陶穴風
景不殊耳余竊以爲憂謬欲舉百廢而興之媿弗逮也迺捐
貲鳩工先葺出政之堂額曰思輯志復古也嗣自城垣戍樓
爰及泮宮武亭漸次茨塹一時煥然耳目蓋勉循職業固守
封疆非徒以肅觀瞻已也若夫舟翠一樓面山帶河懸崖幽
广之中廓然大觀雖鷓鴣一枝而氣象萬千固已具豐鎬之
槩矣於是邑之人士偕來遊者咸顧而樂之登眺歌咏各盡
其興致所至或云猶幽人之頌余則何敢然余喜夫彈丸僻
壤風雅弗墮則雖公劉郇伯之業不可復覩而撫今追昔其

亦有樂而不淫之遺意歟寧直屏山汎水增一佳話也耶

林逢泰暮春舟翠樓讌集詩序予重修邑城建南樓題曰舟
翠蓋取公劉舟玉之義而翠屏山卽所謂迺陟南岡是也抑
先聖有言君猶舟民猶水得夫舟之義夫亦愈思水矣辛亥
暮春告成集諸紳士落之文俶明先生賦詩志歎適同人過
此登覽和咏併錄以志風雅詩云恰攜春酒上層樓汎澗屏
峰積翠收百室桑麻慙政拙數聲蛙鼓對琴謀鶯花繚繞雲
侵袖雉堞飛翔水起洲滿座薰風懸剪拂何須姑射羨城頭
林國珩和韻詩云孤城猶喜有南樓眺覽煙光几席收不盡
風雲生筆興好將詩酒與山謀遠沙鷗白依寒渚隔岸峰青
遠翠洲遙憶故園丹荔熟輕薰移向洞軒頭

楊紹武丁巳春日登舟翠樓感懷用林彙菴明府樓字韻詩

云偶來縱目一登樓萬古風光次第收接檻羣峰皆北向環城誠派轉西流原田未改先農舊陶穴依然太古儔最是比隣多負險連年鼓角動邊秋

右舟翠樓

明邠州志三水縣縣治在布政分司之左大門一坐上有鼓樓五間二門牧愛堂東連庫房西連幕亭儀仗所承發司吏戶禮兵刑工房各六間堂後有延賓堂退思堂宅舍俱知縣楊豫建涼亭劉儀建省耕樓錢若愚建西有典史宅馬房一所土地司囚監俱在儀門外

縣舊志縣治右當元廢縣時爲巡檢司至明成化年知縣楊豫築垣以二里三分高以二丈五尺內建正堂五間簷棚五楹後知縣秦渠又建退堂三間因年久傾圮己酉林知縣又修大堂

曰思軒後堂曰鑑水官衙在鑑水堂後正廳三間扁曰甓香東西廂各三間鸞駕庫幕廳俱在正堂之東邑庫之前東列架閣房吏戶禮房一十二間西列承發兵刑工房一十二間戒石亭在儀門內甬道中堂儀門三間角門二座迎賓館三間在儀門外土地祠三間在賓館右俱明嘉靖年建林逢泰重修省耕樓在縣衙之東同亭在縣衙之左林知縣新建譙樓五間甃石作臺下爲大門知縣劉澇移鐘於土林逢泰重建旌善亭在譙樓南申明亭在旌善亭次

林逢泰同亭觀射詩序余公餘之暇閒步署旁周視有射亭舊址在瓦礫中爰闢其地命胥役壯丁習射以修武詩云二之日其同蓋幽人遺風也亭之左右環植樹木尋得一井甃之以資灌溉令民間有願農圃者聽耕種其中斯亦與民同

之之意也仍舊址築一亭爲觀射之所歲甲寅重陽工成名
之曰同亭偶集文俶明司理王福宇守戎張克其孝廉第五
文昭文起二太學觀射俶明賦詩因并紀之詩云築場爲圃
與民同追步郇邠拜下風懸榻花前隨玉塵焚香夜半和丸
熊雲閒鵬落鏃如樹塞上騎輕雪滿弓極目郊原空抵掌且
將萸菊莫論功

右縣署

縣舊志典史衙在幕廳西前廳三閒正屋三閒東西厦六閒縣
獄在捕衙之前建欽恤廳三閒畫一祠一閒

右典史署

明邠州志儒學在縣東成化十四年知縣楊豫建署縣事邠州
吏目喬茂亨重建教諭署一所訓導署一所學倉二閒射圃在

文廟左今廢

縣舊志儒學明倫堂五閒教諭宅在明倫堂後正廳三閒廂房
三閒訓導宅在教諭宅右正廳三閒西廂房三閒博文約禮齋
冬三閒號房東西各七閒久廢二門一座角門二座東曰起鳳門
西曰騰蛟門桂林坊南街久廢

右教諭訓導署

明邠州志陰陽學在縣南西向知縣馬宗仁建醫學與陰陽學
并社學與醫學并僧會司在縣東北大像寺內道會司在縣東
北三里水泉觀內養濟院在縣北官預二倉在縣西楊豫建有
收糧亭劉儀建後倉侯臣建旌善亭在城舖右申明亭在城舖
左

右陰陽學等

明邠州志布政分司在縣治西按察分司在縣治東府署在縣治南石門巡檢司在石門山下今廢縣舊志察院一座在縣治左廡宇久圯林知縣重修卽舊分司也

右行署廢署

縣舊志石門關在縣東南兩壁如門甃石爲城舊設巡檢司又于嶺上築岸門今巡檢司廢

右關

明邠州志三水縣西溪橋在迎恩門外杜家橋在西溪橋西二里赤道橋在杜家橋西五里暗橋在縣北支唐川岸兩傍縣崖中間道路嘉靖二十七年分巡道副使周洪範建鐵門一重覆屋三間

縣舊志聚珍橋在縣西志岐門外知縣秦渠建今橋圯址存便橋連西城通雙槐堡明末高知縣建年久水衝崩康熙乙卯林知縣重修名曰絲橋甃石架木上設堞牆以防不虞汎水橋在縣南門外夏秋泛漲冬月架木爲梁民不病涉土橋在鎮城東西門外東天橋久圯工大難成土人夾溪築小橋行旅便之其西橋數十武今亦崩壞林知縣捐貲募修以通往來細腰橋在縣西四十里接邠州界長六十餘弓平接兩岸細如蜂腰故名明張拱極聚珍橋記周禮合方氏掌達天下之道路津橋相輳不得陷絕故天根見而成梁慮民病涉也三水城西數十武許溪水自北界來帶縣而南其東西岸距城郭閒甚當衝也歲久滋深溪流滂沛行步齟齬足脛癩痲而攸往罔利矣對峯馬君常遊於此愀然嘆息謂鄉耆杜氏綏曰川澤之阻

則橋梁之便民事也此司牧者之責耳廢弛玩愒漫不葺理非予之任而誰耶蓋避嫌者牽顧慮之私而因循者憚經畫之勞卽廟廡學宮敗垣殘宇草礫相依犬豕交跡莫之問也而況於此橋乎延捐金暨米穀若干責邑民之能幹者數輩若許世經李乾李艾等委以經度物優其價工優其貨甃石爲骨裔土爲基歷數月而橋成焉君遣幣索詞於予曰鄭子產以乘輿濟人於溱洧孟軻氏尚譏不知爲政單襄公知陳之必亡亦以川無梁也橋之係豈淺鮮哉君以明農之身毅然當之乃爲司牧者所未爲則其德惠之及民豈徒見於尹鄉寧時已因是悉君之存心矣是役也經始於萬歷八年二月二十五日落成於九年三月十五日其衆輸若干所費若干不具述惟述豎橋之意利民用用著君之績君名秉直字養浩爲予姻親筮宰鄉寧政聲藉甚其先君雙椿翁暨若兄南峯以高致慕義無窮凡邑內廟觀多所創修故君之率作厥有所自云

明文毓鳳高邑侯創建通堡石橋記維我邑峙鹵極之幽實揔三陲之吭八水之門庭也茲者流寇依爲出没窟每嘆防守之難爰有縣之右翼曰西堡與城犄角立迺古李思齊屯兵舊處離城僅一水隔誠唇齒之要壘也我高侯暨闔邑紳衿僉議墉壑增修深溝高壘更建一石漆通有叟則聯堡以衛民無事則丸泥以自固甚盛舉也於是準地程天鳩財窺日版箋肇興抃輿趨勸侯獻捐俸金近百兩給工孳逸士庶家咸輸乃貲齊乃力勸饗厥舉焉凡一載餘而功竣報當此三空四盡萬難措手之候未嘗并日課功刻谷責辦而壕塹

猝爾立津梁猝爾起匪侯愛民之苦心形之董率民諒侯之
至計竭之興作烏能觀成若此哉自是或有侵賊而城藉堡
堅堡藉城固則民弗苦寇螫或有遣調而丁貳禦城婦女詣
堡則民弗苦兵難或有惶霖而緩急可由城之堡亦可由堡
之城則民又弗苦水怒一舉而三善倭焉余於斯橋亦云謹
志之一片石崇禎壬午仲夏朔旦

按文毓鳳好用古字此記

獨字彳卽工字孛遂卽嗣後字器窳卽共襄字否卽期字或
卽戎字或卽勇字性卽狂字倭卽備字文誠可爲好古者然
識字人見之無竒使世俗者茫然莫辨亦可以已矣

縣冊土橋在鎮城東門外崩壞已久商旅病涉乾隆四十七年
署知縣齊球捐俸重修以利攸徃立有碑記

縣冊野茅溝在土橋鎮東南十里舊本無橋因雨衝崩險側難
行乾隆四十二年創修土橋一座以通徃來

右橋

明邠州志登瀛坊爲馬良佐建鄉貢進士坊爲文朝宗建桂林
坊在儒學大門外毓秀坊在儒學二門外

右坊

縣冊看花宮去城三十里舊名花谷俗謠爲官世傳唐尉遲敬
德植牡丹于此今有阡存

右古阡

三水縣志卷三終